

Matre Haugsdal Helselag

v/leiar Lise Dyrhovden

Matre 23

5984 Matredal

Matre og Haugsdal Helselag (MHH) arbeider for auka trivsel, tryggleik og utvikling i bygdane våre.

Skapa nye møteplassar og oppretthalda dei etablerte treffpunkta våre, som basar, konsert, strikkekafe, julegrantenning, styrking av uteområdet ved skulen og gapahuk ved sjøen.m.a.

Me informerer om sunn kost og helse, hjarte/demens og ynskjer å leggja tilrette for fysisk aktivitet, trygg leik og ferdsel i nærområdet.

Masfjorden Kommune

Austfjordvegen 2724

5981 Masfjordnes

Merknader til reguleringsplan for Matre næringsområde.

MHH kan ikkje sjå at våre merknadar i vesentleg grad er teken omsyn til, og utgreidd for i det utarbeidd planforslaget.

Føremålet med planarbeidet er å leggja til rette for større næringsbygg/datasenter inne på nærings- og industriområdet aust for E39 på Matre.

- **BKK Produksjon AS som eig og driv kraftstasjonen i Matre har ønskje om å få stengt avkjørsel frå E39.** Dette er eit svært trafikkfarleg kryss, der mjuke trafikantar, gjennomgangstrafikk langs E39, og lokal trafikk møtest.
Dette er skule/barnehageveg i dag.
Born/vaksne må kunna ferdest trygt til fots/på sykkel, når dei skal frå Litlematre til Storematre.
Over/ undergang for sikker kryssing av E39 må vurderast.
Flytting av kryss mot Stordalen(Fylkesveg) og vidare flytting av busstopp, for ferdsel både sørover og nordover.
Etablering av gangbru og kryssing av Matreselva, om lag ved Bjørn West Museet/ «Holmen» og over mot næringsområdet må vurderast, for å knyta bustadområde saman med næringområde.
Trafikklys langs E39 gjennom Matre må på plass, likeeins sikre gang/ sykkelveg.
- **Invest in Bergen arbeider med tilrettelegging og utvikling av datasenter i Stor Bergen. Masfjorden kommune har blitt forespurt om å leggja til rette for datasenter i Matre. Møte med aktør som byggjer og opererar datasenter har fått Masfjorden kommune til å starta arbeid med endring av reguleringsplan for næringsområde på Matre.**
MHH har lite kunnskap om kva eit datasenter vil bety for oss som bur her.

Matre er ei lita bygd, med stadig omskiftande aktivitet, det vera seg nye kraftlinjer, master, helikopterflyging, steinknuseverk, sprenging natt og dag, sikringsarbeid i tunellar m.m.m. Me som bur på Matre har i tiår etter tiår, hatt eit høgt toleransenivå på dei ulempene som fylgjer med ulik anleggsverksemd og drift, og me kan ikkje tola nye tiår med kontinuerleg forringing av kvardagen.

Me har mange spørsmål me framleis ynskjer svar på knytt til evt.etablering av datasenter.

Konsekvensar me veit me kan forventa av den daglege drifta er støy.

MHH stiller særleg spørsmålteikn ved kvalitet og relevans på utarbeidd støyrapport, jfr.fylkesmannen sin høyringsuttale.

MHH er svært uroa for korleis drikkevatnet i bygda kan verta påverka.

Det er fleire bustadhus i planområdet. MHH er uroa for korleis deira lokalmiljø kan bli påverka av eit datasenter.

Me forstår att det er snakk om svært store, høge bygningar, på eit inngjerda område, og me er uroa for

korleis det vil påverka lokal ferdsel i næringsområdet.

- **Masfjorden kommune ønskjer å leggja til rette for nye næringsaktørar for å skape meir aktivitet på næringsområdet på Matre.**

MHH meiner det må vera plass til fleire næringsaktørar på området, og forventar at ein har det med seg vidare i arbeidet.

Me er kjend med Bjørn West Museet sine planar for nytt museumsbygg og publikumsretta næring i Grøn Næringspark. Vidare er der allereie eksisterande verksemdar, som også må ha albogerom.

MHH vil at parkdelen i området skal bestå.

MHH sitt viktigaste formål er å arbeida for eit godt bumiljø i bygda, og ynskjer ikkje aktivitet som forringar livskvaliteten vår,

Venleg helsing

Matre Haugsdal Helselag

v/ leiar Lise Dyrhovden